

[Augsburg], 27. Februar 1564

An Joachim Camerarius d. Ä.

BSB, Clm 10370, Nr. 288.

Clarissimo viro, D. Ioachimo Camerario, Domino et amico suo colendo. Leipzig.
 S. Tanto iam tempore, Clarissime vir, nullas abs te literas accepi, vt vix ad te scribere audeam. Audeo tamen, humanitate tua singulari, et perpetua erga me benevolentia fretus, quam ijs maximè temporibus declarasti, quibus res meae tenuiores etiam, quam nunc sunt, fuerunt. Etsi enim Fuggeranis aedibus, voluntate mea magis, quam ἐκβολῇ exulo, tamen diuina benignitate mihi neque σκεπάσματα neque διατροφαὶ desunt, καὶ τὸ λιτοδίαιτον ὑγιέστερον ἀπηργάσατο, τουτέστιν, ἡττον νοσοῦντα. Quòd si magis etiam afflictæ esset fortuna mea et valetudo: tamen te Wolfium in numero tuorum habiturum, non desperarem. Hanc de te fiduciam literæ tuae quantumuis breues et renouabunt et confirmabunt. Curaui nuper γρηγορίου τοῦ Νύσσης τὴν μεγάλην κατήχησιν ἐν μ' κεφαλαίοις describendam, duobus pro vno codicibus summa veteris mei domini facilitate et benignitate, impetratis, adeò vt nullum in tota bibliotheca librum habere se dixerit, quem mihi, data syngrapha, quò sibi caueatur, non libenter sit vtendum daturus. καὶ πολλοὶ μὲν ἐν ἐκείνῃ θησαυροὶ ἀπόκεινται, ήμâς δὲ ταχυγράφοι τε καὶ δαπάναι ἐπιλείπουσιν. Egi tamen hoc ipso die per literas cum Heruagio hac de re. Qui si sumptus suppeditare non recusarit: Ego et codices impetrabo, et vt emendate describantur, pro virili curabo. Sed ad Catechesin redeo, quam ad te misissem, si illam vertere voluisses, et mittam, vbi iusseris. Interim collegae meo Matthiae Schenckio vertendam dedi, qui stylum suum in opere non magno illo quidem, sed graui atque difficili periclitari voluit, te censore vsurus interpretationis suaे, si graue tibi non fuerit. Noui quod scribam nihil est, nisi quod pestis, diuina benignitate, plurimum remisit, et comitia breui apud nos fore rumor est, quae eò gratiora mihi futura sunt, quod te, more scilicet tuo, huc euolaturum speramus. Quid filij tui agant, in primis D. Ioachimus, scire, eosque saluere cupio. Ducas Wolfgangi redditus in expectatione est, cuius praesentia nisi opis aliquid tulerit, Laugingensis schola corruet priusquam exaedificata est. Vale. 4 Cal[endas] Martij 1564.

Hiero[nymus] Wolfius.